

VENDIM
Nr.228, date 23.4.2004

PER RREGULLIMIN E VEPRIMTARISE ME JASHTË TE ADMINISTRATES SHTETERORE

Ne mbështetje te nenit 100 te Kushtetutës dhe te nenit 5 te ligjit nr.9095, date 3.7.2003 "Për shërbimin e jashtëm te Republikës se Shqipërisë", me propozimin e Ministrit te Punëve te Jashtme, Këshilli i Ministrave

VENDOSI:

1. Ministritë, institucionet qendrore dhe organet e pushtetit vendor e ushtrojnë veprimtarinë e tyre me jashtë ne lidhje e bashkëpunim te ngushte me Ministrinë e Punëve te Jashtme. Për këtë qëllim, anëtarët e Këshillit te Ministrave, drejtuesit e institucioneve qendrore dhe te organeve te pushtetit vendor ndërmarrin veprime, mbajnë qëndrime dhe bëjnë deklaratata, qe kane te bëjnë me marrëdhëniet me jashtë, duke marre me pare miratimin dhe udhëzimet e Ministrisë se Punëve te Jashtme.
2. Ministrat, drejtuesit e institucioneve qendrore dhe te organeve te pushtetit vendor nuk bëjnë deklaratata për probleme te rëndësishme, qe kane te bëjnë me zhvillimet kryesore ne rajon apo vende te tjera, ne kundërshtim me programin e qeverise dhe politiken e ndjekur nga Ministria e Punëve te Jashtme.
3. Ministrat, drejtuesit e institucioneve qendrore dhe te organeve te pushtetit vendor ne korrespondencën me ambasadore e përfaqësues te tjerë te huaj, te akredituar ne Republikën e Shqipërisë, për çështje me karakter politik ose me rëndësi për marrëdhëniet e shtetit tone me shtetet e tjera apo organizatat ndërkombëtare, duhet qe, brenda 24 orëve, te njoftojnë Ministrinë e Punëve te Jashtme, e cila brenda 48 orëve jep me shkrim mendimin e saj për qëndrimin qe duhet mbajtur.
4. Ministrat, drejtuesit e institucioneve qendrore dhe te organeve te pushtetit vendor për veprimtaritë ku marrin pjese dhe bisedimet qe realizojnë me personalitete te huaja, brenda dhe jashtë vendit, te dërgojnë, brenda 15 ditëve nga përfundimi i veprimtarisë, ne Ministrinë e Punëve te Jashtme dhe ne Kryeministri, një relacion. Relacioni përmban te dhënat për qëllimin dhe objektin e veprimtarisë për ecurinë e bisedimeve dhe për rekomandimet përkatëse për çështjet e diskutuara. Për çështje te rëndësishme ose urgjente Ministria e Punëve te Jashtme mund ta kërkojë dorëzimin e relacionit edhe brenda një afati me te shkurtër.
5. Ministritë, institucionet qendrore dhe organet e pushtetit vendor komunikojnë zyrtarisht me përfaqësitë diplomatike te Republikës se Shqipërisë, te akredituara jashtë vendit, nëpërmjet Ministrisë se Punëve te Jashtme.
6. Vizitat zyrtare te anëtarëve te Këshillit te Ministrave jashtë shtetit zhvillohen vetëm pasi Ministri i Punëve te Jashtme te jete shprehur me shkrim, si dhe pas miratimit nga Kryeministri. Anëtarët e Këshillit te Ministrave, brenda çdo tremujori te paraqesin me shkrim pranë Kryeministrit dhe ne Ministrinë e Punëve te Jashtme planin e vizitave qe planifikojnë te kryejnë gjate tremujorit ne vazhdim. Anëtarët e Këshillit te Ministrave janë te detyruar qe, jo me vone se 15 dite para datës se nisjes, te paraqesin te Kryeministri dhe Ministri i Punëve te Jashtme, ftesën e marre dhe kërkesën për realizimin e vizitës, ku te parashirohen nevojat e kryerjes se kësaj vizite, afati i qëndrimit dhe shpenzimet përkatëse. Ministri i Punëve te Jashtme, brenda 2 ditëve nga marrja e kërkesës, dërgon mendimin e vet me shkrim, pranë Kryeministrit. Kryeministri i kthen përgjigje me shkrim anëtarit te Këshillit te Ministrave, brenda 3 ditëve pas marrjes se njoftimit nga Ministri i Punëve te Jashtme. Një kopje e kësaj përgjigjeje i dërgohet Ministrisë se Punëve te Jashtme. Ne rastin e vizitave zyrtare urgjente, te paparashikuara te anëtarëve te Këshillit te Ministrave, miratimi u jepet drejtpërdrejt nga Kryeministri, mbështetur ne kërkesën e tyre. Vizitat private te anëtarëve te Këshillit te Ministrave jashtë shtetit, brenda kohës normale te punës, bëhen pasi te jete dhënë me shkrim miratimi i Kryeministrit. Vizitat private te anëtarëve te Këshillit te Ministrave jashtë shtetit, jashtë kohës normale te

punës, mund të realizohen vetëm pasi të jete njoftuar me shkrim Kryeministri.

Shpenzimet e kryera për vizita zyrtare, që zgjasin tej afatit të përcaktuar dhe për të cilat nuk është marre miratimi i Kryeministrit, nuk përballohen nga shteti.

7. Drejtuesit e institucioneve qendrore dhe të organeve të pushtetit vendor nuk mund të pranojnë ose të refuzojnë ftesa zyrtare nga homologët e tyre, si dhe nuk mund të dërgojnë ftesa zyrtare, pa u këshilluar me parë me Ministrinë e Punëve të Jashtme.

8. Ministritë, institucionet qendrore dhe organet e pushtetit vendor, në ushtrimin e veprimtarisë me jashtë, kanë për detyrë:

a) të njoftojnë, menjëherë, Ministrinë e Punëve të Jashtme, për të gjitha problemet me karakter politik, ekonomik apo teknik, që dalin gjatë takimeve të drejtuesve të institucionit me përfaqësues të trupit diplomatik të shteteve dhe me përfaqësues të organizatave ndërkombëtare, të akredituara në Republikën e Shqipërisë apo nga letrat dhe mesazhet që autoritete të huaja i dërgojnë drejtuesit të institucionit;

b) të organizojnë, në bashkëpunim me Ministrinë e Punëve të Jashtme, takimet e drejtuesit të institucionit me homologët e tij, brenda dhe jashtë vendit;

c) të organizojnë protokollin e takimeve të drejtuesit të institucionit me delegacionet e huaja apo me përfaqësues të trupit diplomatik, të akredituar në vendin tone;

ç) të njoftojnë, çdo tre muaj, për planin e vizitave të delegacioneve të kryesuara nga drejtuesi i institucionit apo nga zyrtarë të lartë, si dhe të delegacioneve të huaja që do të vizitojnë vendin tone;

d) të dërgojnë, çdo tre muaj, në Ministrinë e Punëve të Jashtme, një raport të hollësishëm për të gjitha veprimtaritë me jashtë të institucionit, duke përfshirë edhe ecurinë e marrëveshjeve dypalëshe e shumëpalëshe;

dh) të dërgojnë pranë Ministrisë së Punëve të Jashtme të dhëna dhe raportime, sipas kërkesave dhe afateve, për zbatimin e detyrimeve ndërkombëtare të vendit tone.

9. Ministria e Punëve të Jashtme ka për detyrë:

a) të njoftojë ministritë, institucionet qendrore dhe organet e pushtetit vendor për veprimtaritë dhe zhvillimet ndërkombëtare, që bëjnë pjesë në sferën e veprimtarisë së tyre;

b) të ndihmojë me materiale, brenda përgjegjësisë së vet, dhe të këshillojë për përgatitjen e vizitave dhe të takimeve të planifikuara të ministrive, institucioneve qendrore dhe organeve të pushtetit vendor;

c) të ofrojë ndihmën e nevojshme ligjore në procesin e lidhjes së traktateve dhe marrëveshjeve ndërkombëtare nga ministritë, institucionet qendrore dhe organet e pushtetit vendor, në përputhje me dispozitat në fuqi;

ç) t'u komunikojë përfaqësive diplomatike të Republikës së Shqipërisë, kërkesat që vijnë nga institucionet e ndryshme, të cilat i gjykon të arsyeshme;

d) të organizojë, periodikisht, takime të rregullta me drejtuesit e strukturave të marrëdhënies me jashtë të ministrive dhe institucioneve qendrore për informimin dhe bashkërendimin e veprimtarisë së tyre me jashtë;

dh) të ndihmojë në përcaktimin e qëndrimeve që këto organe duhet të mbajnë brenda sferës së veprimtarisë së tyre, për çështje që kanë të bëjnë me marrëdhëniet me jashtë;

e) të ndihmojë ministritë, institucionet qendrore dhe organet e pushtetit vendor për njohjen dhe vendosjen e kontakteve me strukturat e ngjashme të shteteve të tjera, si dhe të organizmave ndërkombëtare.

10. Vendimet nr.514, datë 4.9.1995, të ndryshuara, nr.435, datë 20.10.1997, nr.305, datë 1.7.1999 të Këshillit të Ministrave, revokohen.

Ky vendim hyn në fuqi pas botimit në Fletoren Zyrtare.